

# DECLARATION

DV ROY EN FAVEUR

DE SES SVBIECTS DE LA

Religion pretendue reformée ,  
qui sont & demeureront en leur  
devoir & obeissance.

*Publiée en Parlement le ving-septième  
Auril mil six cens vingt-un.*



A PARIS,

Par FED. MOREL, & P. METTAYER,  
Imprimeurs ordinaires du Roy.

M. D C X X I.

*Avec Privilege de sa Maieité.*

THE HISTORY OF THE  
REIGN OF KING CHARLES THE FIRST

BY SAMUEL JOHNSON  
ESQ. OF LONDON  
IN TWO VOLUMES  
THE SECOND VOLUME  
LONDON: Printed by J. DODD, in Pall-mall.  
MDCCLXXII.

Printed by J. DODD, in Pall-mall.  
MDCCLXXII.



NOVIS PAR LA GRACE DE DIEV ROY DE FRANCE ET DE NAVARRE, A tous ceux qui ces presentes lettres verront, Salut. Depuis que nous auons pris en main la conduite des affaires de nostre Royaume, Nous auons reconnu que l'vne des choses plus necessaires pour maintenir nos subiects en repos & tranquillité, est de faire entretenir soigneusement les Edicts de Pacification & Declarations faites en faueur de nos subiets, faisans profession de la Religion pretendue reformée : C'est pourquoy nous y auons tousiours trauaillé autât qu'il nous a esté possible. Et mesme pour leur donner d'autant plus de subiect

A ij

de se contenir en leur deuoir , & se  
loïier de nostre bonté, Nous auons  
bien souuent dissimulé & assoupy les  
desobeissances & contrauentions  
que plusieurs d'entre-eux ont com-  
mises, ou bien nous auons essayé de  
les detourner des fautes ausquelles  
ils se portoient par des aduertisse-  
mens & Declarations que nous auõs  
faictes & enuoyées où il a esté besoin  
pour leur donner cognoissance de  
leur deuoir: Ce que nous voulusmes  
pratiquer au mois d'Octobre dernier  
sur l'aduis qui nous fut donné, que  
nosdits subiets se disposoient à con-  
uoquer & tenir vne assemblée sans  
nostre permission en nostre ville de  
la Rochelle , Surquoy nous fismes  
vne Declaration pour interdire la-  
dite assemblée , & defendre à tous  
ceux qui y feroient deputez de s'y  
acheminer, & à ceux de ladite ville



5  
de la Rochelle de les y receuoir sur  
les peines y contenues, esperant par  
ce moyen les diuertir de ce desseing,  
à quoy aucuns ont obey: Mais com-  
me il arriue souuent que ceux qui  
ont les meilleures intentions n'ont  
pas tousiours le plus de creance par-  
my eux, Tant s'en faut que cette no-  
stredite Declaration ait produit tout  
le fruit que nous en esperions, que  
au mespris d'icelle, plusieurs d'entre  
eux n'ont delaisié de tenir ladite as-  
semblée, Et en suite d'en conuo-  
quer & faire d'autres en plusieurs en-  
droits de nostredit Royaume, sous  
diuers tiltres & pretextes, dans les-  
quelles ils ont faict des Decrets &  
Arrestés, comme d'auctorité souue-  
raine, publié des Ordonnances pour  
tenir la campagne en armes, courir  
sus, & prendre comme par represail-  
les nos subiects, contre les Arrests

de nos Cours de Parlemens, esleu & nommé des chefs, tant pour la campagne que pour les Villes: & y ont pris pour leur conduitte d'autres resolutions si pernicieuses qu'il s'en est ensuiuy des licences, exceds & desordres tres-grands dans vne bonne partie des villes & places qu'ils tiennent, ayans faict faire en icelles des fortifications extraordinaires, leues de deniers & d'hommes, enrollemens de gens de guerre, fontes d'artilleries, achapts d'armes, assemblees illicites & autres actions du tout contraires & preiudiciables à nostre auctorité & à l'obeissance qui nous est deuë: Dõt encores que nous ayons tout subiect de demeurer offensez, Neantmoins nous auõs voulu patienter plusieurs mois, & considerer si d'eux-mesmes ils ne se porteroient point à la recognoissance

de leurs fautes , pour en rechercher de Nous la grace qui leur peut estre necessaire: & n'auons pas voulu de-laisser cependant de faire pouruoir à plusieurs points & articles, dōt nous auons esté suppliez par les deputez qui resident près de nous de la part de nosdits sujets faisans profession de ladite Religion pretendue reformée. Mais considerant maintenant que tant plus les choses vont en auāt, & plus les licences & les desobeissances s'augmentent parmy la plus part d'entre-eux , & que l'audace de ce faire se peut accroistre par nostre esloignement, Nous auons pris resolution de nous acheminer du costé de la Touraine & du Poictou, & passer plus outre pour visiter les autres Prouinces de nostre Royaume, à fin qu'estans plus proches du mal, nous ayons plus de moyen d'y pour-

uoir avec l'intention que nous con-  
 seruons tousiours de maintenir le  
 repos public, & faire soigneusement  
 obseruer à l'endroit de ceux de ladi-  
 te Religion qui se contiendront en  
 obeissance les Edicts & Declarations  
 qui ont esté faits en leur faueur, &  
 les faire iouir des graces & conces-  
 sions qui leur ont esté octroyées :  
 Comme aussi faire chastier ceux qui  
 se sont portez & demeureront en des-  
 obeissance. Et à fin que cette nostre  
 intention soit cognue d'un chacun,  
 & que nosdits subjets de la Religion  
 pretendue reformée qui demeurent  
 dans l'obseruation de nos Edicts,  
 ayent subiect d'y prendre toute con-  
 fiance, **NOUS DE L'ADVIS** d'au-  
 cuns Princes de nostre Sang, autres  
 Princes, Ducs, Pairs, Officiers de no-  
 stre Couronne, & principaux de  
 nostre Conseil, **AVONS dit & de-**  
 claré,



claré , difons & declarons par ces  
prefentes , voulons , entendons &  
nous plaift , Que les Edicts & Decla-  
rations faites par le feu Roy nostre  
tres-honoré Seigneur & pere ( que  
Dieu abfolue, ) & par nous, tant pour  
la feureté & liberté de conſcience &  
exercice de ceux de ladite Religion  
pretendue reformee , que pour la  
iouiffance des graces & conceptions  
qui leur ont eſté octroyées par iceux,  
ſoient obſervez & gardez exactemēt  
& de point en point ſelon leur for-  
me & teneur , pour ceux de noſdits  
ſubiects de ladite Religion preten-  
due reformée qui ſont & demeure-  
ront en leur deuoir & obeiffance :  
Leſquels, enſemble leurs familles &  
biens, Nous auons pris & mis, pre-  
nons & mettōs en noſtre protection  
& ſauuegarde ſpeciale. MANDONS  
aux Gouverneurs & Lieutenans Ge-

neraux de nos Prouinces, Et commandons tres-expressément à tous Gouverneurs & Capitaines de nos villes & places, Baillifs, Seneschaux, Preuosts, Iuges ou leurs Lieutenans, Maires, Consuls, Escheuins, & habitants d'icelles, & à tous nos autres Iusticiers, Officiers & subjets qu'il appartiendra, de faire iouir nosdits subjets de ladite Religiõ pretédue reformée, de l'effect de nosdits Edicts & de la presente Declaration, & auoir soin de leur seureté & conseruation: Cõme aussi nous faisons pareil commandement à ceux qui commandent & ont l'auctorité dans les villes qui sont en la garde de ceux de ladite Religion, de prendre le mesme soin de nos subjets Catholiques qui y sont habituez, sur peine aux vns & autres d'en respondre en leurs propres & priuez noms. Voulât qu'il

soit procedé contre ceux qui y contreuiendront, & qu'ils soyent punis & chastiez comme perturbateurs du repos public, selon la rigueur de nos Ordonnances: Enjoignant à nos Procureurs Generaux & leurs Substituts d'en faire toutes poursuittes & requisitions necessaires.

SI DONNONS EN MANDEMENT à nos amez & feaux Conseillers les gens tenans nos Cours de Parlemens & Chambres de l'Edict, Que cette nostre presente Declaration ils facent lire, publier, & registrer, & du contenu en icelle, faire iouir nosdits subjets pleinement & paisiblement selon sa forme & teneur dans toutes les villes & lieux de leur ressort, sans y contreuenir ny permettre qu'il y soit contreuenue en quelque sorte & maniere que ce soit. CAR tel est nostre plaisir. EN RES-

moins de quoy nous auons faict mettre nostre seal à cefdites presentes.

DONNÉES à Fontainebleau le vingt-quatriesme iour d'Auril, l'an de grace mil six cens vingt-vn. Et de nostre regne le vnziesme.

Signé,

LOVIS.

Et sur le reply, Par le Roy,

DE LOMENIE.

Et scelee du grand sceau de cire iaune sur double queue.

Et sur ledit reply est encores escrit :

*Leuës, publiées et registrées,  
oy et ce requerant le Procureur  
General du Roy, Ordonné que*



*coppies collationnées seront en-  
uoyées aux Bailliages et Senes-  
chaussées , pour y estre à la dili-  
gence des Substituts dudit Pro-  
cureur General , leuës , publiées  
et executées selon leur forme et  
teneur , et certifieront la Cour  
auoir ce faict au mois. A Paris  
en Parlement le vingt-septiesme  
Auril mil six cens vingt-un.*

*Signé, DV TILLET.*

---

*Sommaire du Privilege.*

**P**AR Lettres patentes du Roy, donnees à Paris le vingt-deuxiesme iour de Feurier, mil six cens vingt, signees, LOVIS, & sur le reply, Par le Roy, DE LOMENIE, & scellees du grand scel dudit Seigneur, en cire iaulne, sur double queue: verifiees, tant en la Cour de Parlement, Chambre des Comptes, Cour des Aydes, Chastelet de Paris, qu'au Bailliage du Palais: Il est permis à Federic Morel, & Pierre Mettayer ses Imprimeurs ordinaires, d'imprimer, ou faire imprimer, vendre & debiter tous Edicts, Ordonnances, Mandemens, Lettres patentes, comme aussi tous Arrests, tant de son Conseil, que de ses Cours, sans qu'autres Libraires & Imprimeurs les puissent imprimer ne faire imprimer, vendre ne distribuer, en quelque sorte & maniere que ce soit, sur peine de cinq cens liures d'amende. Voulant au surplus, que tout ce qui se trouuera imprimé de ce que dessus, par autres que lesdits Morel & Mettayer, soit saisi & cancelé comme nul & faulx, & faict contre son auctorité & commandement.



